



08635

天 津 特 別 市
市 立 第 二 圖 書 館

古 籍 08635



天津特別市市立第二圖書館 28-11,1.0000

觀文勤心



奉宸廿番

宣統三年閏月五閏運拜題

譚文勤公奏稿

一

譚文勤公奏稿

譚文勤公禮像



譚文勤公像贊 拜序

文勤公招通籍余在公事嘗親初為余言文卿嘗歎驚人後必
大譽又聞初主時有推生命者書於官進一品壽七十四其後壽
過所推知者以為能遂命全府知當六十餘年說其政學於辟其執
事可傳者及人猶能知之其諸子以畫像視余乃昔摩汝時照像所撰
遂為贊曰

名臣之容恆郵予有惠其福當
替其氣如焮公之葬幸為國重
臣老成凋謝其志弗申歸臥於
林四溟滔：甄是冥觀而可捐搖
河日濶明夫豈偶然唯餘慶
以全其天式此先照昭于蒼齡

宣統三年正月

王闓運年八十拜題



代今其天左... 領之香稿
林四溟滔：甄是冥觀而可捐搖
自夫叔歷橋其志弗申歸臥於
替其氣如焮公之葬幸為國重
名臣之容恆郵予有惠其福當

譚文勤公像贊

譚文勤公奏稿卷首目錄

上諭

諭祭文

御製碑文

國史本傳

湖南巡撫端方奏摺

神道碑銘

墓表

行狀

譚文勤公奏稿

卷首目錄

譚文勤公奏稿卷首

光緒三十一年四月十三日內閣奉

上諭前任兩廣總督譚鍾麟老成練達學問優長由翰林改官御史簡放外任洊陟疆圻服官四十餘年所在整飭吏治勤卹民依於地方要政尤能力持大體前因患病奏請開缺回籍茲聞溘逝軫惜殊深譚鍾麟著加恩予諡照總督例賜卹任內一切處分悉予開復應得卹典該衙門察例具奏伊子安徽試用道譚寶箴著俟服闋後以道員仍畱原省儘先補用伊孫譚輔宸著賞給員外郎用示篤念蓋臣至意欽此

譚文勤公奏稿

卷首

諭祭文

朕惟專闡重師干之寄資輔翼於元臣歸田乞簪笏之身
示優崇於耆宿方冀里居通德長荷殊榮何期望重靈光
遽來遺疏眷懷勞勩用錫馨香爾原任兩廣總督譚鍾麟
性秉忠貞才長幹濟少年登第標清望於瀛洲萬里持衡
拔英才於鄂渚負青橐繡衣之望氣本如霜重銅虎竹符
之司民爭頌佛惟良報最典名郡以敷猷破格酬庸超外
臺而晉秩嗣是開藩陝右移節浙西蜺旌布化者廿年蟬
冕行春者七省戎容暨暨煥牙旗鼓角以增嚴良士番番
寄舟楫鹽梅而無忝品原超眾優給頭銜用叶爲儀特崇
羽飾雖引疾許歸桑梓而趨朝旋附棘槐日贊贊襄不負
譚文勤公奏稿

卷首

二

天宮小宰之職功懋懋賞爰崇東宮少保之稱朕軫念邊
疆重煩碩輔聿頒龍節坐鎮羊城控桂林象郡之提封靖
烽火鯨波於絕域節樓盡瘁久昭授鉞之勤宣室陳情再
允縣車之請還鄉六稔應知夢繞觚稜示疾崇朝忍說魂
歸箕尾噩音遠達追念良殷稽古典以易名命外臣而賜
醴於戲勤宣中外聽鼓鼙則思將帥之臣禮備哀榮式尊
俎而志股肱之美欽茲休寵尙克歆承

御製碑文

朕惟國家於疆圻大臣恆慎厥選聿求操履純潔才識優裕者畀以重權俾之鞏固提封外攘內安用嘉惠我士庶於歿也則易名以榮之鑄石以永之典至懋焉爾原任兩廣總督譚鍾麟易直樸誠根於天性自通籍登仕入直玉署出賦皇華克勵躬行爰彰令望泊乎南臺備職白簡生風言事則洞達閭閻養廉則勤飭篋篋用是試爾爲杭州知府太守爲股肱之吏臨安實財賦之區爾洩事惟勤處膏不潤誠能動物惠以得名關西有清白稱湖學爲東南最用是擢爾爲河南臬司累遷陝甘總督夫陳臬開藩擁旄建節豈爲示優崇於耆宿實將普教養於烝黎爾別蠹譚文勤公奏稿卷首

三

安良整綱肅紀提祥刑於汴水備岳牧於鎬京錢塘昭坐鎮之勳關隴寄保釐之任巖疆碩輔節鉞名臣鑑湖雖賜知章宣室旋徵賈誼用是起爾爲吏部侍郎當海疆多事之秋正臣子致身之會典選固資良弼折衝尤恃通才遂移寇準於北門重任守仁於南國用是除爾爲閩浙四川兩廣各總督敷歷中外四十餘年兩粵東西兼圻最久值橫流之汎濫峙砥柱以嶙峋卒收總制之功無忝鞠躬之誼朝廷亦寵之儀羽優以宮銜錫仗馬以趨朝賜安車以就第何圖殂謝良用咨嗟諡曰文勤俾彰懿美於戲人臣苟能清白乃心奉公體國則生也委任卒也哀榮飾終之典容有靳歟其勒貞珉昭茲來許

國史本傳

譚鍾麟湖南茶陵州人咸豐六年進士改翰林院庶吉士九年散館授職編修是年秋

大考翰詹列二等

賞袍料一匹十年充會試同考官鍾麟甫留館未與考差蓋異數也同治九年充湖北鄉試副考官一年五月

記名以御史用十一月補江南道監察御史時天下多事言官率昧大體毛舉細故鍾麟以爲御史當效忠補闕深維國家利便令可施行若但許陰私立朋黨非

譚文勤公奏稿

卷首

四

朝廷重諫官意也乃疏請申明定例非廉明伉直有節操者勿得保送御史違者坐其長官下部議如所請三年截取奉

旨記名以繁缺知府用四年春恭親王奕訢被

嚴旨罷議政下其事內閣令王公以下詳議具奏罪且不測鍾麟獨與吏科給事中宗室廣誠等聯名上奏曰三月初九日內閣奉

旨交下惇親王及編修蔡壽祺具奏摺件著王公大學士九卿翰詹科道會議又於十四日奉

旨發下醇郡王等各摺著一併詳議具奏等因欽此仰見皇太后

皇上審慎周諮之至意臣等恭閱惇親王醇郡王等所奏均係爲大局起見恭親王自議政以來夙夜在公尙無遺誤屢荷

優詔獎其賢勞在

聖恩非私於一人此天下臣民所共信至於

召對之時言語不檢誠不得爲無罪一經

天威震疊當必愧悔交集補救不遑臣等伏念海內多事之秋全賴上下一心共資康濟而於懿親爲尤甚若廟堂之上先啟猜嫌根本之間未能和協駭中外之觀聽增宵旰之憂勞於大局實有關繫臣等忝居諫職未敢緘默不言至用舍之權操之自上

譚文勤公奏稿

卷首

五

非臣下所敢妄議疏入

懿旨以廣誠等摺內各語持論固屬重大於朝廷辦理此事苦心尙未領會因復降

旨宣示百僚以毫無猜嫌之意

命恭親王仍在內廷行走並仍管理各國事務衙門十二月授杭州府遺缺知府五年到省時浙江當大兵後百廢待舉巡撫馬新貽重鍾麟名卽奏補杭州府知府下車以恤流亡理獄訟清賦稅爲務六年二月以前在

國史館纂辦大臣年表

賞加道銜是冬署杭嘉湖道督海塘工濬長安河皆稱利

賴馬新貽密保其才可大用七年擢河南按察使
八年三月母憂去官十年服闋入都陝甘總督左
宗棠疏請

飭赴甘肅既得請未行授陝西布政使十一年正月護理
巡撫事鍾麟故嘗游陝知其民情取所疾苦更易
之初漢回積不相能至是值回亂眾禁回民出城
窮饑者無以營生計鍾麟弛其禁令漢民不得相
讐遇訟訟戒屬吏毋有所袒回眾感泣誓不犯法
旋還布政使任時左宗棠方督師甘肅設糧臺於
陝西各省協甘軍餉亦皆道陝鍾麟乃設局行鈔
徵發立應悉無畱誤更以餘暇興學立書局濬鄭

譚文勤公奏稿

卷首

六

白渠教民種桑蠶織大興光緒元年擢陝西巡撫
先以籌餉功

賞頭品頂戴左宗棠復奏言數年來百姓綏靖糧餉不匱
臣得一意軍事無兼顧憂皆鍾麟力奉

旨賞戴花翎三年陝西大旱先是鍾麟依社倉法督州縣
積穀至數萬石乃盡發以賑選任幹吏不假手胥
役頒禁令十條嚴治圍戶及侵漁者富平知縣劉
志同高陵知縣陳衍昌辦賑欺飾鍾麟奏革訊治
斬胥吏以徇官民震懾時晉豫皆旱饑

兩宮爲之旰食發內帑糴沿江粟以賑之猶不能全濟陝
獨晏然論者以晉豫陝災同而有司請發獨異疑

陝諱災

朝廷乃以鍾麟前後奏宣示且有實惠及民之

褒焉五年春因病請開缺奉

旨賞假兩月勿庸開缺並

勉以時事艱難當力圖報稱未可遽萌退志八月調浙江
巡撫加兵部尚書銜浙江自兵燹後田業失主多
爲豪強兼并號荒產匿不納租有司按問率不得
要領鍾麟遣官按籍稽徵曉以禍福遂各還其初
錢塘縣吏何秉仁浮收遭糧計贓盈萬逮斬之知
縣陳國香亦坐遣戍盡革墊完透息諸弊民情大
歡踴躍輸納增運十餘萬石於鹽則查減曬版召
譚文勤公奏稿卷首
商集貲承運又更定釐稅於貨物首所過局計遠
近並征聽其所之不再畱難商民稱便築礮臺修
海塘重建文瀾閣皮藏

高宗所賜四庫書開局延文儒校刊羣籍治聞一時七年

八月遷陝甘總督甘省邊遠貧瘠屯軍歲餉數百

七

萬皆仰給他省至不以時鍾麟奏獎諸布政使運
解迅速者自是饋餉相屬新疆既平創設巡撫歲
以甘餉三之二濟之時其緩急不令缺乏西域道
遠輻傳相望州縣輒斂民車費時失業最爲害鍾
麟乃立官車局以供轉運民不知役舊商人承運
花馬池鹽貪利昂其直私販因以充斥商困稅絀

乃罷舊商定就場徵課法稅增什二鹽直反大減
盡罷諸苛細捐及芻豆徵累民者民困以蘇又以
久遭兵燹士多失學於蘭州建求古書院甘州建
河西精舍選高才生講肄其中十年法越事起鍾
麟奏請自率精兵五千人入衛有

詔止之乃以提督雷正綰自代餉械自給不別請部款迄
於罷兵十三年河決鄭州工久不就鍾麟籌解六
十萬金助塞及賑災民奉

旨優敘督廿九年庫儲至百餘萬兩州縣積穀數百萬石
十倍初至時初鍾麟至甘肅郎患目疾前後四請
解任均

譚文勤公奏稿

卷首

八

賞假慰留

賜珍藥十四年益劇至不能視自陳乞開缺兩奏始奉
硃批譚鍾麟向來辦事認真深資倚任前因目疾屢經寬
予假期並賞藥餌以期速愈茲據縷陳病勢日劇萬
難任事情詞迫切未便拂其所請譚鍾麟著准其開
缺回籍安心調理一俟就愈卽行來京陛見家居兩
載日復明

十七年二月奉

詔入都

恩賜紫禁城內騎馬四月

詔以尙書銜補吏部左侍郎八月兼署戶部左侍郎兼管

三庫事務十八年三月署工部尚書五月授閩浙
總督二十年恭逢

孝欽顯皇后六旬萬壽正月

懿旨賞加太子少保銜七月兼署福州將軍十月調四川
總督未行二十一年四月調兩廣總督粵素多盜
賭風尤甚奸猾之徒懼爲吏所持則公請以博進
贏餘助軍餉歲輸三十萬金所謂四成報效者也
鍾麟至任以賭爲盜源不禁賭則盜終不可止而
官徵賭款尤傷政體乃奏罷賭餉盡封禁諸賭館
尤嚴官吏賕請之罰又闡姓商歲輸公家亦數十
萬金闡姓商者鄉會試方入闡時取與試士子姓
譚文勤公奏稿卷首

九

爲覆聽人射之謂之卜榜花得多者勝贏利鉅萬
闡商六年一更易爭欲承充則競納賄自總督以
下多寡有差鍾麟惡之將議禁而闡餉所從來尤
久關於部款猝未可革鍾麟乃令輸貲百六十萬
者充之自總督以下不得更索一錢示定期限逾
期不如數以所輸沒入官羣不便者造蜚語百端
不爲動久之中外言籌餉者稍稍及賭捐欲弛禁
朝廷下總督議鍾麟覆奏曰禁賭以來議者紛紛至
謂賭爲粵民生計禁終不止費出於賭取之無傷
臣愚竊所不解夫上之於民猶父兄之於子弟爲
父兄者必無恃子弟博以自奉之理况

國家歲得不過數十萬金而小民傾家蕩產者何止百數十萬民之不利國何利焉臣非不知賭禁雖嚴未必遽絕然上無所利則聚賭之匪人受賄之官吏無可藉口尙不敢肆意橫行一旦弛禁人民既無忌憚不肖官吏復因而牟利上下交征亂可立待雖有百萬將焉取之至於所言禁賭則生計日窮一省之民恃賭爲生計中外古今安有是理若謂盜風之熾由於禁賭言尤不經聞因賭而窩盜賭輸而爲盜者矣不聞賭可弭盜也無識之徒罔顧利害飾辭聳聽所言萬不可信所請斷不可行奏上

譚文勤公奏稿

卷首

十

上深韙之然言者猶不止鍾麟復疏爭之事乃寢廣東交涉日繁鍾麟不得行其志乃以病求去疏五上二十五

十五年十一月

命來京陛見旋

賞假兩月回籍就醫明年

萬壽覃恩

賞戴雙眼花翎四月入

覲復自陳始

命開缺畱京當差七月

乘輿西幸鍾麟以衰疾不能從乃乞歸三十一年卒遺疏

諭曰前任兩廣總督譚鍾麟老成練達學問優長由翰林改官御史簡放外任洊陟疆圻服官四十餘年所在整飭吏治勤恤民依於地方要政尤能力持大體前因患病奏請開缺回籍茲聞溘逝軫惜殊深譚鍾麟著加恩予諡照總督例賜卹任內一切處分悉予開復應得卹典該衙門察例具奏伊子安徽試用道譚寶箴著俟服闋後以道員仍畱原省儘先補用伊孫譚輔宸著賞給員外郎用示篤念蓋臣至意尋

賜祭葬

子諡文勤子寶箴安徽道員延闈翰林院編修孫輔宸員

外郎

譚文勤公奏稿

卷首

七

頭品頂戴湖南巡撫奴才端方跪

奏爲在籍大員因病身故代遞遺摺恭摺仰祈

聖鑒事竊據太子少保原任兩廣總督譚鍾麟家屬稟報該故督前於光緒二十五年十一月在兩廣總督任內奉

旨來京

陛見並因病奏請開缺在先

賞假兩月二十六年假滿北上又經籲懇開缺奉

旨爾京當差嗣因舊病復發請假回籍就醫迄未痊愈茲於光緒三十一年三月十二日因病在籍身故遺摺一摺並該家屬呈請代

譚文勤公奏稿

卷首

三

奏前來

奴才

覆查該故督

臣

譚鍾麟本以翰林受

三朝知遇之

恩改官御史外放知府洊涉疆圻服官四十餘年宅心中

正蒞事推誠官御史時遇事敢言多所論列外任

浙江知府旋授河南按察使陝西布政使陝西巡

撫調補浙江巡撫所在整飭吏治勤卹民依實心

行實政當在陝西時關輔初定庫積空虛而邊事

未清軍需尤急譚鍾麟剔蠹理紛鈎稽出入頻年

而軍府饒裕官民賴之及在巡撫任內積存銀六

十餘萬又令州縣辦積穀逾數百萬石其後陝省

大饑卽出穀賑貸不足以存銀買穀繼之是時晉

豫鄰省皆赤地千里陝西雖饑獨無流離之患才官陝時民間父老述其遺愛猶爲稱道不衰旋由浙江巡撫升授陝甘總督因目疾告歸病愈後補吏部左侍郎改閩浙總督調補兩廣總督值時局多艱海疆有事譚鍾麟從容鎮靜不假張皇官民恃以無恐地方要政尤能力持大體言論豐采爲僚輩所敬憚卒以舊病復發開缺回里未竟厥施奴才到湘後該故督病勢已深未能頻加咨訪茲竟溘逝里門湘省士紳無不同聲悼惜謹爲舉其蒞官大略並將該故督家屬繕送遺摺恭呈

御覽其應如何

譚文勤公奏稿

卷首

十三

加恩賜卹之處出自逾格

鴻慈該故督長子寶箴安徽試用道三子延闈翰林院庶吉士四子恩闈從一品廕生五子澤闈分部郎中孫輔宸從二品廕生考授主事胡宸光宸均幼曾孫三人合併查明附陳所有在籍大員因病身故代遞遺摺緣由謹恭摺具陳伏乞

皇太后

皇上聖鑒謹

奏

軍機大臣奉

旨另有旨欽此

皇授光祿大夫太子少保兩廣總督賞雙眼花翎諡文勤

譚公之碑

特賞侍講銜翰林院檢討禮學館顧問官湘潭王闓運撰

公諱鍾麟字文卿長沙茶陵人也其先自吉安永新徙十
四世世爲良農考諱之恆國子監生強學博物樂誨童冠
公卽其叔子也仁宣之際農儒交困涉履寒苦在約淵澹
早傾乾蔭母劉訓育千里赴試徒步負極提學取進第一
鄉舉第八咸豐六年進士選翰林九年授編修大考高等
遂充會試同考官不由考差蓋承特簡同治元年湖北鄉
試副考官二年補江南道監察御史四年署吏科給事中
文憲之任風采高翔朝宁息危毅然不撓恭忠親王以負
譚文勤公奏稿

卷首

十四

辰之望邁畫室之疑有詔大議眾皆阿唯公不隨署獨上
奏曰海內多事正資康濟若廟堂之上先啟猜嫌根本之
地未能和協駭中外之觀聽增宵旰之息勞大局有關未
敢緘默同臺感悟僉名者十餘人大臣悚待愬於不測翌
日有詔恭王復直當此之時公名振海內明年出補杭州
遺缺知府巡撫欽名卽補杭州未及考滿擢河南按察使
母喪服除擢陝西布政使令望旣章二遷超次臺省之重
僉曰允哉到陝護巡撫事光緒元年就授巡撫五年陛見
加兵部尙書移撫浙江七年補陝甘總督日眚請告詔令
臥治三歲四請許歸就醫道出華陰隱士楊叟慕公德政
扶杖施鍼翳目復明以親政詣覲兩宮優禮畱補吏部左

侍郎權工部尚書出督閩浙一兼將軍移四川未上調督
兩廣於時朝政更新人謀富強貪入奢出唯恐不給領海
縣富摸金搜粟官徵博進自同囊家公堅申賭禁奏駁羣
議罷歲收頭錢銀卅萬兩及部徵賭餉數十萬利臣大慙
蜚語詆譏暨康梁爲妖交通權倖公簿錄其家具發私書
羣小盜憎危撼百端廿五年法琅西議界特詔廣西提督
泣盟不關總督提督棄地公自劾乞罷前後七請被命入
朝更給假兩月促徵詣覲乘輿西遷不及扈從瀕洞隔絕
還歸增疾杜門五年祝宗是祈卅有一年三月乙酉薨於
長沙里第年八十有四詔書特賜祭葬諡文勤錄其子孫
禮同在位粵以明年二月葬於善化白泉之原官立御碑

譚文勤公奏稿

卷首

五

於是故吏門人以爲國有史牒鄉有表著公私之義也公
四佩督印兩長部堂嘗自許不動聲色厝安天下國患貧
弱未嘗言利任陝藩償逋餉銀百數十萬兩儲庫猶百餘
萬積穀數百萬石募糴又數百萬晉豫振荒萬里驛騷關
隴初不告飢民無流亡撫浙飭吏激清鹽漕督陝甘罷無
名稅捐免徵民車芻豆津沽用兵自請率五千人入衛且
供齋糧鄭州河決上助工六十萬金聞者驚嗟怪其恢侈
知杭州捕斬土豪徐都司在吏部廷杖奸吏督閩浙裁汰
驕軍嚴覈船工皆職思其外不徇時俗海上軍興南北洋
斂船避敵閩船巡洋自如承浙陝軍荒撫綏完輯迺視學
修文開局刊書自厲勤儉一無玩好僚吏簡肅黎民便安

雍梁回叛官嚴禁銅臥瘞庭室餓枕牆壁公弛城禁居民
竝懽回感德威終任馴伏興陝蠶桑戶有機聲至今傳譚
公綢以配召杜李鴻章張之洞先鎮南海利開賭禁公獨
奏賭爲亂源雖日入百萬於國無利茲可謂持大體去食
去兵者已宜其貴壽無極以維世作型天祿有終京師鄂
驚哲人其萎吾將安放乃爲銘曰

於穆我公綱紀三朝克靜以威不濁不撓爰在憲臺曾弗
撫拾一言興邦四海和叶亦旣剖符高陟台司遂鎮秦越
民忘兵饑北野實荒經營辟疆偃武以文汲臥淮陽入掌
銓衡吏不敢飯命作司空禹垂是纂閩土瘠貧公至如春
南海多賁捐金於淵國不患弱患無與立公之所臨熙精
譚文勤公奏稿

卷首

六

默洽名不赫赫志則躬躬藏形一北善始令終何以表哀
百寮歎誦

夫人同州陳氏先三十年薨葬州茶鄉子寶箴附貢生安
徽試用道員遺疏 恩以道員儘先補用次子寶符中書
科中書早卒側室顏宜人鍾恭人皆先卒李恭人子延闈
試貢士第一選翰林院庶吉士湖南科舉以來會試未嘗
首貢天下榮公之教次恩闈從一品蔭生澤闈分部郎中
孫冠宸中書科中書早卒輔宸從二品蔭生特用主事
恩賞員外郎繼祖丁酉拔貢生候選同知早卒次翊宸光
宸贊宸曾孫壽曾頤曾嗣曾

誥授光祿大夫太子少保兩廣總督文勤譚公墓表

醴陵縣教諭武陵陳壽綸撰

光緒三十有一年三月十二日茶陵譚公薨於長沙里第時以兩廣總督致政歸五年矣事聞天子震悼

詔用總督卹典賜祭賜葬予諡文勤蓋異數也越

三年其子延闈以狀來謂余稔知公行實求爲表隧之文余維公自通籍後數歷中外五十年政行炳於國史且

湘潭王檢討闈運旣銘其墓本末詳盡何俟鄙言無已惟舉所習聞者以示來葉焉公幼稟承家學入詞垣受知於

文宗皇帝咸豐九年大考翰詹上親擢二等卽

邀簡在逾年未與考差特命校士禮闈同治初元典試

譚文勤公奏稿

卷首

七

鄂中同官謂我輩衡文貴擇老境公曰不然當爲聯捷地是科得人之盛鼎甲悉備皆公所甄採生平侃侃論事持正不撓初登臺諫值天下多事言官互相攻訐率昧大體公奏請申明定律非廉明伉直有節操者不得保送御史違者罪坐長官得旨下部議行穆宗初年恭忠

親王委裘輔政言者譏其簞簞不飭屢播彈章朝廷一

旦震怒罷之罪且不測下廷議諸貴近希旨言王旣罷

政宜邀寬典持稿示羣臣則皆書諾公獨不之從謂國有大疑始謀及卿士否則安用會議爲眾訝曰上意已定

小臣敢爾耶公正色曰職無大小事有是非公等曷由知

上意遂抗疏同列感動願附名者四十餘人奏略曰伏

見恭親王自議政以來夙夜在公尙無遺誤屢荷 優詔
獎其賢勞在 聖恩非私一人此天下臣民所共信至於
召對之時語言不檢恭親王渥承恩眷自蹈愆尤誠不得
爲無罪一經 天威震疊當必愧悔交集補救不遑臣等
伏念海內多事之秋全賴上下一心共資康濟而懿親爲
尤甚若廟堂之上先啟猜嫌根本之地未能和協駭中外
之觀聽增宵旰之憂勞於大局實有關係臣等職司諫諍
未敢緘默不言至用舍之權操之自 上非臣下所敢議
也 上大感悟 詔恭忠親王復直 樞廷一疏回天於
是公之直聲震天下此同治三年也明年出守杭州中丞
馬端敏公傾心委任公選吏清賦理訟獄恤流亡其安良
譚文勤公奏稿 卷首 六

之實尤在除莠拘土豪徐正魁數其恃眾殺人奪良家婦
諸罪狀白巡撫亟斬之萬眾謹踴仁和蠹吏何秉仁以浮
勒錢漕富累巨萬聲氣廣通公擬治之無其端厥後撫浙
民炷香於頂膝行訟秉仁者數十人逮之至秉仁曰有何
罪公擲各狀令自省始匍匐悚息命牽去誅之秉仁一顧
緩頰者卽至則無及矣其後入掌天官每歎馭貴馭富之
柄悉操自吏胥銓選進退弊不勝窮乃畱心精覈一日廉
得其奸予杖不稍貸廷杖胥吏殆創見也督閩中亦然若
輩冠服楚楚數其罪褫而笞之左右索僚屬規費者立予
屏逐所在威惠大行初權杭嘉湖道時督治海塘濬長安
河汲汲爲民興利工皆速就洎由陝藩躋開府濬鄭白渠

收八川之利甚厚罷織呢局糜費一意治蠶桑移浙桑秦地募浙工教之蠶織大興人號譚公綢公私饒衍與民休息郡縣積穀至數百萬石庫儲充實已而秦飢出穀以振全活數十萬人同時三晉魯豫皆赤地千里奏請發帑截漕猶虞不足獨秦撫寂無所聞台臣以膜視劾公 朝廷宣示公奏皆備慮不虞民懷其惠言者大慚當是時左文襄公督師西征糧儲百物悉綜於公遣客軍萬餘人償欠餉百數十萬皆節縮允費所致文襄公言秦中自兵燹後百物彫敝民生日蹙倉府之積儲掃地以盡中丞不動聲色措置其間饋糧轉餉無時或乏余得以廓清掃蕩而前無後顧憂者皆中丞之力而又口不言功沈懷淵默余曷譚文勤公奏稿 卷首

十九

敢忘其勞以此

奏上朝廷嘉安秦之績 賞戴花翎

命移撫浙中至則巡歷沿海郡縣慨然歎曰浙亦東西海疆門戶用武之地也飭修葺温台乍浦澈浦鎮海定海諸礮台兵弁則雷強汰弱又增十數營以備征防水師則裁併畫一隨在有備德清俞樾氏爲文壽公歷舉其功在廟社功在閭閻功在海疆功在藝林四端以宣布令德自附於四子講德之義蓋曲園之重公至矣旋總制陝甘繼文襄公擘畫新疆行省規模宏遠皆公手定修吏事汰冗兵立新餉轉運所不令缺乏設官車局禁斂民車民大安之迨光緒十年法越事起公忠義憤發奏請提精兵五千入衛或直搗諒山惟 朝命是聽 優詔止行乃以提督雷

正綰自代居 帝畿餉械皆自任於時文襄公詒公書曰
某公之意見夫人而知之矣至謂中國不可戰不能戰自
是無恥公覽而壯之既聞和議成於是中宵歎喟言國事
自茲不復振矣治秦隴九年吏畏民懷無水潦兵戈之事
庫儲百餘萬河決鄭州日久不塞嘗提六十萬金爲助且
振災民 上諭褒美此疆吏中所未聞者至甘之五年卽
患曰眚數請解任遞 賜珍藥慰畱至於廢視乃力請開
缺兩奏始得 俞允自謂此生無復報國期矣僚屬餞公
之夕中道目忽開朗見星月皎潔頃刻復矇亦屬異事還
過西安得異人楊醫者能以鍼法治目初鍼左目深入分
許細撥翳障公喜曰吾能視矣醫請仰臥三日勿動三月
譚文勤公奏稿 卷首 三

再鍼右目遂復明醫言腦漏入睛則成雲翳目光猶玻璃
垢去則如初無他巧也特令人不講耳居長沙二年 寄
諭聞公疾愈起爲吏部左侍郎兼權工部尙書凡估計工
役人視爲利藪公不列銜名吏以十倍牘進者則痛減之
賸銀卻不受同列以爲難比總制閩中申嚴軍律防海又
採運湘穀十萬餘石以濟民貧兼將軍時悉以所入償前
將軍虧負餘皆發善後局濟公用一無所取閩自左文襄
沈文肅公創船政立法綦嚴厥後閩人窟宅其中歲糜百
餘萬數載成一船輪啟船退走則皆笑大臣裴公自愧無
狀投馬江幾死公簡閱各廠百工循環伺其所至鑪錘攻
錯之聲聞然退則散去迺立斥主者擇精覈廉能數員董

之兩載成兵輪二艘省費無算已而東事興公馳奏宜合
南北洋兵船先據朝鮮攻日本海口不能坐待敵時議悉
主保船故南北海軍咸屏息避匿公曰製船原爲今日保
船何爲者獨飭閩船轉運臺灣上海來往自如在閩三年
移督兩廣時吏事窳惰盜賊公行公一繩之以法廉得積
弊官民皆注意於賭闈姓尤大宗號闈商商專其利輸銀
數十萬號闈餉內外藉以自肥禁之頗格部議乃倍其值
令有輸百六十萬入餉者許充闈商意在不禁之禁於時
牟利者多不便造蜚語百計陷公不爲動 朝廷亦右之
久之中外言籌餉者思弛賭禁公覆奏曰自禁賭以來議
者紛紛至謂賭爲粵民生業禁終不止費出於賭取之無

譚文勤公奏稿

卷首

五

傷臣愚竊所不解夫上之於民猶父兄之於子弟爲父兄
者必無恃子弟博以自奉之理況國家歲得不過數十萬
金而小民傾家蕩產者何止百數十萬民之不利國何利
焉卽甚患貧豈遂須此或能責取百萬亦猶飲醜止渴終
必隨斃兩疏剴切忠直語在奏議中封上畱中而事竟寢
終公之任未嘗弛禁生平華夷之界最嚴遇事一無遷就
甘州教主以教堂失材木恣睢督堂公命繫之臬蘭獄又
洋工以織呢旣罷失重利贅贅不休令械送漢口彼亦無
辭至閩中民教互訟州縣斂手達於制府者必據理以爭
旣總理衙門讓公公令錄案寄總署自理之二十三年德
人踞膠州奏言割地斷不可許許卽無以爲國不報是時

英人欲築九龍至廣州鐵路法索合浦卅權公皆持約章力拒之及英租九龍法租廣州灣既定約乃告公公大憤謂自壞長城要挾將無窮矣業許德誠無辭拒英法法果背租約溢索吳川廣州灣界更強踞遂溪境地幾盡東海全島公不許相持一年遂溪民結團練以死拒敵公遣將五千人爲聲援勢洵洵不相下二十五年秋 朝廷命廣西提督蘇元春往議界事瀕行公堅屬力爭至則盡償法所索地略不關白公大怒電奏劾蘇請立廢所定約會遂溪民與法兵鬪傷其酋法攻焚陳村及赤坎各墟墟民男婦死者殆盡反昌言於 朝必斬知縣公電陳此皆總督事無與知縣法屢傷吾民問何以償 朝廷不得已黜遂

譚文勤公奏稿

卷首

三

縣知縣以謝界遂定公歎曰爲國家守土不能保復重傷吾民尙何顏居此乃力求解任五奏皆給假並 賜尙方珍物至冬方許入 覲因奏陳病狀仍給假兩月回湘就醫明年以 萬壽恩 賞戴雙眼花翎及入都 召見頤和園 恩慰隆厚公拜起艱 特命內官扶掖公力陳衰老乞許開缺三請雖奉 俞允仍 命留京當差公意視 屢後請歸未幾拳亂大作 朝部一空人謂公曰旣無官守留亦無益盍速行公曰嘗爲大臣觀 國難忍先去耶至七月 西巡始以衰疾增劇乞歸歸則 西望長安不時哽咽蓋憂國之誠未稍釋也公諱鍾麟姓譚氏字雲觀一字文卿湖南長沙茶陵州人少苦貧封君時出爲鄉

里解紛難太夫人終歲紡織黽勉有無歲臘嘗出正布令
公餽其師出涕曰此吾家度歲資也公以此發憤勵學就
試長沙往返千里皆徒步道光二十五年督學陳公壇拔
置州學第一食廩餼自度尙難中雋丙午不赴省試己酉
遂登鄉舉咸豐丙辰成進士改翰林院庶吉士戊午授編
修任 國史館總纂己未會試同考官辛酉充湖北副主
考不肯以邊郡例處施南是科施南中式七人官文恭公
大愧服同治二年記名御史冬補江南道監察御史轉京
畿道三年署吏科給事中五年以京察一等授浙江杭州
遺缺知府署杭嘉湖道文文忠公議政時心竊重公薦於
朝七年擢河南按察使三月丁母憂十年服闋入都時

譚文勤公奏稿

卷首

五

左文襄公方督陝甘奏公才略請飭赴甘肅習邊事許之
旋授陝西布政使至則權撫部節明年還任布政使光緒
元年巡撫陝西 賞頭品頂戴五年調補浙江巡撫加兵
部尙書銜七年授陝甘總督十四年以日疾告歸明年疾
瘳翁尙書贈聯有君曰再明天有功之語十七年奉 召
入都以尙書銜補吏部左侍郎署工尙又派充殿試讀卷
大臣十八年總督閩浙兼船政大臣七月攝福州將軍管
閩海關稅務二十年加太子少保十月調署四川總督未
行二十一年四月調兩廣總督二十五年因病辭職益力
十一月乃有來京 陛見之旨於後公造辟自陳言臣非
惜身恐衰疾貽誤 國事始奉 旨開缺其厯官如此性

孝友每念伯兄季弟早世不遠數千里延仲兄恕堂君西
安舉觴爲壽相對怡怡請 馳贈褒榮冀紓其曩時艱苦
七十告歸焚黃祭奠猶伏地舉哀觀者莫不感動至矜恤
同年故舊無間死生自處又力崇儉敝平居論學一以踐
履篤實爲主訓子弟與誨他人亦然宦轍所至必垂情古
典揚滯甄微甘州創河西精舍以課士蘭州則建求古書
院及至澗中重新文瀾閣庋藏四庫全書延文儒校讎又
出千金購圖書集成以惠來學訪同里譚希思所著明大
政纂要及馬端敏公奏議傅青主徵君方書刻於閩中皆
不惜重資所著有陝甘奏議閩浙奏議兩廣奏議春及廬
文稿家訓劄記若干卷公生於道光二年壬午三月十九

譚文勤公奏稿

卷首

五

日享壽八十有四曾祖諱和祖諱世峻父諱之恆國子監
生卽九濤先生也皆以公貴贈光祿大夫曾祖妣周氏祖
妣李氏繼祖妣劉氏皆贈一品夫人配陳氏封一品夫人
先公三十年卒側室顏氏封宜人鍾氏封恭人皆前卒李
氏封恭人劉氏封宜人子男五長寶箴附貢生安徽試用
道奉 旨服闋後儘先補用次寶符中書科中書早卒皆
陳夫人出次延闈由優貢生中式壬寅科舉人甲辰會試
第一翰林院編修次恩闈從一品廕生次澤闈分部郎中
天資尤卓越女一適善化附生唐贊慈皆李恭人出孫六
人冠宸中書科中書卒輔宸從二品廕生 特用主事奉
旨賞員外郎繼祖丁酉拔貢生候選同知卒胡宸光宸

贊宸孫女四長適翰林院編修尹銘綬曾孫三壽曾頤曾
嗣曾曾孫女一以三十二年二月卜葬善化白泉荷葉塘
之原公館余六載禮遇至厚暇則就予談早歲辛苦及中
外時事輒相與歛歎及夫晚節每遇交涉重務則耿耿獨
立持理分寸不移薑桂之性天下殆無復有我公者已是
可長太息也自謂粗足以知公茲從延闈請特紀其夙聞
者如此其他政績詳於狀者不具載光緒三十四年戊申
九月醴陵教諭陳壽綸表

譚文勤公奏稿

卷首

皇清誥授光祿大夫太子少保頭品頂戴 賞戴雙眼花

翎兵部尚書兼都察院右都御史兩廣總督先府君行狀

曾祖諱和 贈光祿大夫妣周氏 贈一品夫人

祖諱世峻 贈光祿大夫妣李氏繼妣劉氏 贈一品

夫人

父諱之恆國子監生 贈光祿大夫妣劉氏 贈一品

夫人

府君姓譚氏諱鍾麟字雲觀始諱二監字文卿鄉舉後更
今名湖南長沙府茶陵州石牀鄉人先世自江西永新來
遷當元至正時世爲農樸謹有家法十三傳至世峻公是
爲府君祖父敦厚豁達不苟然諾以忠信率鄉里名聞湘

譚文勤公奏稿

卷首

三

以東父之恆公能文有懿行教授湘潭學者稱九濤先生
母劉夫人慈孝勤儉更百苦保持其家見府君所述狀兄
弟四人伯諱鑫麟仲諱錫麟 贈資政大夫季諱鎮麟國
子監生皆前卒府君其叔也幼而英毅目光炯然聲清洪
如鐘後官京師投謁公卿聞人聞罄欵皆竦肅出侍始入
塾發問已屈其師家貧不能供餽粥年十六卽授徒自給
已乃發憤讀書山寺誦習常至夜分所處絕困厄非人所
堪而志氣彌厲入府應試徒步數百里往返未嘗乘船車
道光二十三年提學試第一入州學明年補廩膳生二十
九年鄉試中式咸豐六年會試中式 賜進士出身改翰
林院庶吉士九年散館授編修是年秋大考翰詹府君名

在前列

文宗親第甲乙有所進退以次置二等明年派充會試同考官故事考官必嘗與考差者府君獨否蓋大考簡

帝心故也同治元年充湖北鄉試副考官施南府入國

朝鮮得鄉舉總督官文恭公欲別出其試卷俾用邊郡例

得舉試官同辭稱善府君獨曰奉命主試不可更舊章且

安知施南終不舉者而苗疆例之持不可是科施南中式

者七人文恭大愧服二年記名御史或謂府君居史館

久以勞卽得外任宜謁假勿他徙官府君笑謝曰富貴在

天可趨避乎冬補江南道監察御史時天下多事言者雜

進率昧大體毛舉細故府君深非之以爲御史不效忠補

譚文勤公奏稿

卷首

三

闕深維國家安危利害令可施行苟逞私意攻訐致

朝廷益輕諫官所關繫不淺乃奏請申明定例非廉明伉

直有節操者不得保送御史違者罪坐長官得

旨下部議行三年春恭忠親王被

嚴旨罷議政王下其事九卿科道罪且不測府君以署吏

科給事中會議內閣至則諸貴近大臣已夙爲奏大略言

王先有成勞以罪業罷政宜得免議傳示眾曰議已定趣

署名府君既取視其草則大言曰

朝廷惟有所疑故令集議奈何首鼠持兩端某不署名皆

大詫曰此何事

上意已定小臣乃爾耶府君正色曰御史何職事有是非

安知

上意何小臣也奮然下堂具語同列諸大臣議不可用將
獨奏論列聞者感動自給事中廣誠君以下四十餘人爭
願聯名府君乃爲奏曰伏見恭親王自議政以來夙夜在
公尙無遺誤屢荷

優詔獎其賢勞在

聖恩非私於一人此天下臣民所共信至於

召對之時語言不檢恭親王渥承

恩眷自蹈愆尤誠不得爲無罪一經

天威震疊當必愧悔交集補救不遑臣等伏念海內多事
之秋全賴上下一心共資康濟而懿親爲尤甚若廟堂之
譚文勤公奏稿

卷首

三

上先啟猜嫌根本之地未能和協駭中外之觀聽增宵旰
之憂勞於大局實有關繫臣等職司諫諍未敢緘默不言
至用舍之權操之自上非臣下所敢議也奏上

上大感悟復恭忠親王直軍機竟用盡平諸寇致中興當
是時府君名震京師五年以京察一等授浙江杭州府
遺缺知府浙江當大兵後百廢待舉巡撫馬端敏公夙聞
府君賢相見大喜卽奏補杭州府知府傾心委任事無大
小一以咨府君府君慎選僚屬恤流亡理獄訟清賦稅捕
斬諸豪強徐正魁張桂林等徐正魁者從軍至都司橫行
鄉里擅殺人又公奪良家婦積不法人側目視無如何官
不敢捕羣謂黨羽眾急之且生變府君不聽密部署吏役

誘入城急捕下獄盡案得罪狀白巡撫置之法觀者數千人無不謹呼知府真好官也在官三年一署杭嘉湖道威惠大行督治海塘工速辦濬長安河舟楫大通於是馬公奏薦府君可大用而軍機大臣文文忠公自議內閣時已偉視府君屢言於

上七年擢河南按察使是時文忠未嘗識府君府君初不知爲文忠所舉及後知亦竟不謝知者於是兩賢之

召對之官三月以母喪歸十年除喪入都陝甘總督左文襄公前督閩浙深知府君才賢奏請飭赴甘肅習邊事既得請未行授陝西布政使至則護巡撫府君故嘗遊陝知民情僞至是盡取所疾苦更易之微密周緞皆如人意所譚文勤公奏稿

卷首

无

欲出至今尸祝不衰民與回民積不相能值回亂因公禁回民出城卽死瘞室中雖窮餓終不得出謀生計府君惻然曰海內皆朝廷赤子回獨非人耶何爲趣之反也將弛其禁僚屬皆諫府君笑曰卽欲反甯以城限耶竟下令聽出城禁民毋得相讎卽訟戒屬吏無有所袒回眾感泣誓不犯法後府君督陝甘回眾相謂公在此無敢有貳回性狡悍當承平時已無數年不爲變終府君任九年竟無事及去未幾遂大亂云十一年還任布政使府君初至陝西直軍事新定府庫空竭養兵多歲以不給而左文襄公方督師甘肅徵餉東南設糧臺陝西他別將金忠介公穆果勇公諸軍饟亦皆道陝西餽道遠或不時至悉賴陝西

轉輸乃設局行官鈔鈔多不能對持鈔者嗟怨相戒不授受公私大困府君乃取浮蔓不急之費官吏所窟宅爲奸者盡廓清之歲得巨金別儲之以贖鈔來易者如鈔予以錢費不十萬鈔大行至不可贖乃益獎進廉吏倡節儉謹出內行之期年軍府饒裕竟用罷遣客軍萬餘人償欠餉百數十萬庫儲猶百餘萬於是袁文誠公內召所謂西征糧臺者總於府君徵發立應不繼卽取庫儲濟之師行悉無畱誤更以餘暇興學立書局濬鄭白渠教民種桑蠶織大興陝人所謂譚公綱由府君也光緒元年授陝西巡撫府君官陝西五年習知僚吏才短長使各當其任威信孚於軍民令行禁止恢如也三年關內外悉平府君先以籌譚文勤公奏稿

卷首

三

餉功 賞頭品頂戴至是左文襄公奏言數年來百姓綏靖糧餉不匱得一意軍事無內顧憂皆巡撫力奉

旨賞戴花翎其年陝西大旱府君既有先事之蓄又嘗依社倉法督州縣積穀至數百萬石乃盡發以振更出庫藏購之湖廣甯夏包頭數道並進募民輓運計里授食設爲更相遞代以兵法部勒雖遠道畢達分設籌振所選廉幹吏及鄉之負民望者任之不假手胥役所請發直達巡撫應時立行頒禁令十條嚴治圍戶及侵漁者富平知縣貪浮立投之獄其胥吏斬以徇官民震懾無敢作奸當是時山西河南皆旱飢

天子爲之盱眙出重臣發內帑告羅遍江海天下騷然僅

乃得濟獨陝西晏然若無事所振活百數十萬人無流亡之患而府君焦心勞思晝夜治文書數月未嘗安枕每中夜起立庭除仰視天高無雲憂心旁皇輒坐達旦陝甸之間鬚髮皓然盡白論者謂陝西微府君且大亂甘肅新疆地初定人心易搖天下事未可知也府君惟知此故先事率屬勤政厚其蓄積成不可動之勢賞罰嚴明人灼然見利害所在不敢玩偷民忘其荒上下均瞻府君治之甚從容也既事而無矜容淺者猥見陝西山西河南災同所請發獨異疑有所諱頗以上聞及

朝廷宣示府君前後奏且有實惠及民之衰始慙歎自失

五年任滿入

觀三

譚文勤公奏稿

卷首

三

召見慰勉有加十月調補浙江巡撫加兵部尙書銜前官浙江功績聲聞爲士民所信愛聞當來皆大喜府君亦自喜得盡其志銳意爲治糾污獎良吏治清明以爲今籌餉亟欲無過求於民必自復經常之制始浙江稅以鹽漕爲大自兵燹後田業無主多爲豪強兼並號荒產租稅匿不納前巡撫按問率不得要領於是毅然排羣議遣官按籍稽定曉以禍福各還其初仁和縣吏何秉仁淨收漕糧積資數十萬立逮斬之將軍以下皆爲請卒不聽按知縣罪至遣戍盡革塾完透息諸弊民輪踴躍增運十餘萬石於鹽則查減曬版召商集資承運於釐稅則首所過局計遠近並徵之聽其所之商民大便後二十年計臣建統稅法

本此也躬巡海瀕葺築礮台督修海塘視一日之工以爲程費半功倍重建文瀾閣收藏

高宗賜四庫書開局延文儒校刊羣籍浙江治聞天下七年冬授陝甘總督承左文襄公後大功初定善後萬端劇且大甘肅地邊遠貧瘠歲餉四百八十萬皆仰給他省常苦不至府君乃奏獎諸布政濟餉迅速者尤務聯以情手書殷勤至誠相感發得者競勸饋餉無不繼新疆設巡撫府君本謀也設官分職規畫宏大多出手定立新餉所歲以甘肅餉三之二濟之時其緩急不令缺乏內則汰冗兵修吏事尤務休息民甘肅爲通西域道輶傳相望州縣率歛民車廢時失業最爲害府君乃立官車局供轉運禁譚文勤公奏稿卷首

三

役民効罷不如令者花馬池鹽舊以商承運直昂私販充斥商大困稅亦紬府君罷舊商用就場徵課法稅增什二鹽直反大減於是盡罷諸稅捐及芻豆徵累民者又以民遭亂失學下州縣出公家錢廣立義塾復斥金起大屋蘭州曰求古書院甘州曰河西精舍選諸生秀異者講肄其中厚其廩給以通經習當世務爲程風趣爲一變十年法越事起府君奏言甘肅雖褊小尙可得精兵五千人請率以入衛

優詔止行乃以雷提督正綰自代餉械一甘肅任之迄於罷兵未幾河大決鄭州工久不就府君復奏言甘肅幸有餘蓄請以六十萬助塞河及振災民朝野驚歎以爲非

意所及當是時天下言貧弱首甘肅而府君臨事忠義奮發急君父之難常爲天下先一歲中三奉

上諭褒美天下服其公忠居官九年吏畏民懷無水旱兵戈之事庫儲銀至百餘萬兩州縣積穀數百萬石十倍初至時後三年甘肅大飢卒以無害初府君至甘肅之五年卽患目眚數請解任治疾皆給假慰留

賜珍藥十四年疾益劇至不能視乃力陳狀乞開缺兩奏始得

諭旨明年受代還長沙道陝西得楊醫鍼目復明居二年朝廷知府君疾愈

詔趣入都十七年三月至京師

譚文勤公奏稿

卷首

三

上初親政

召見問西北邊事及當世人才甚悉府君具以所知對四月

詔以尙書銜補吏部左侍郎部臣風尙位尊者不親庶務卑者又無權胥吏乃攘其柄府君獨勤於職司壹是無少假借嘗以公事予吏杖一時京朝官皆詫爲未聞署工部尙書吏以贖進所列工值十倍府君痛減之同列或不懌府君曰必若此吾當執奏會去任乃已十八年出爲閩浙總督福建故瘠區自甲申治海防費甚巨皆貸之外人罄歲入償庫儲掃地盡養兵數十營恣橫無紀律數爲暴民銜之次骨諸統將狂臺灣役尤驕蹇不易裁制而船政局

歲費百餘萬在事者視爲利藪肆侵牟府君大簡船局穴食者盡斥去之選精覈者主工廉幹者主材人思自奮兩年成船二工倍往時既深知兵不堪用召諸將數之曰若等前事倖耳

朝廷賞功不薄今庫藏垂竭忍坐視乎且兵以衛民奈何暴閩里皆惶恐自引責由是盡汰罷老申明約束軍律一新句稽歲出入除冗去濫遂畢償前所舉債又以閩困極矣所可藉手者惟鹽然鹽課歲四十餘萬徒虛語以文書督責而已非大減舊額酌變更章必無效凡三四奏請終格部議不行二十年加太子少保銜六月中東事興大興兵防海府君獨謂兵力視夙所備何如耳苟募烏合無益

譚文勤公奏稿

卷首

語

害且滋多時浙江臺灣皆務增兵多者至百營不能如府君所戒然其氣精銳軍實備皆不如閩遠甚敵亦竟不至後和議成諸防海者率費數百萬罷遣所募兵多譁變久乃得定福建獨無事費不過百萬世以是多府君當事初起府君電奏宜合南北洋兵船先據朝鮮攻日本海口不宜坐待敵時議皇皇言保船不能用福建惟兩船府君令往來臺灣上海間職轉運諸海軍蜷伏不敢出海上獨有閩船或謂府君公豈謂獨閩船堪戰耶府君曰擲鉅萬金製船爲有今日不能一收效何以謝天下誠知不堪戰保船何爲於時北洋海軍多閩人恒怯爲世詬病而閩船奉令無敢避人以知府君能用人也七月兼署福州將軍管

閩海關稅務海關故多弊值軍事商旅不行稅常絀府君所以整飭之甚具大要在屏吏役任土人所入過承平時盡以補前將軍虧負未嘗自言功十月調四川總督未行二十一年四月調兩廣總督承困敝之後綱紀放弛盜賊公行吏事不修貪虐窳惰之風相扇萬事紛然不可猝理府君一繩之以法矯之以廉持之以靜慨然曰粵患盜多非民性然也充欲倖獲之心不至爲盜不止則賭爲之也終歲捕斬以千計而盜不少哉此非禁賭不爲功且官食於賭復何以臨民乃奏革舊所定賭餉曰四成報效者歲三十萬盡封諸賭館有犯必懲尤嚴官吏納賄之禁於是

以賭爲利者皆怨謗尋復有閩姓商事閩姓者覆鄉會諸

譚文勤公奏稿

卷首

三

試者姓聽人射之得多者勝贏利鉅萬以商專其事號闡商歲納銀數十萬號闡餉每六年易商則競納賄總督以下賄多者得爲商府君深惡之將並議禁而闡餉舊關部庫格不行會易商府君下令輸資百六十萬入官者卽充闡商自總督以下不得更索一錢明示期限逾期輸不如數並所輸沒入官或請於府君商所輸非盡已資沒之疑太過府君曰固知之不如此不足示信粵人久虛視文告競思以他途進吾所爲亦使知法不可嘗試也時羣不便者造作蜚語怪幻不可究詰言者紛起百計欲傾府君冀開賭禁遂其私府君堅持不爲動又

朝廷嚮用殷計不得售居久之中外言籌餉者稍稍及賭

捐妄言弛禁卽得巨款章下府君府君以賭不禁廣東終
不可治覆奏言自禁賭以來議者紛紛至謂賭爲粵民生
業禁終不止費出於賭取之無傷臣愚竊所不解夫上之
於民猶父兄之於子弟爲父兄者必無恃子弟博以自奉
之理況 國家歲得不過數十萬金而小民傾家蕩產者
何止數十百萬民之不利國何利焉卽甚患貧豈遂須此
臣非不知賭禁卽嚴未必遽絕然上無所利則聚賭之匪
人受賄之官吏無可藉口尙不敢肆意橫行一旦弛禁人
民旣無忌憚不肖官吏復因而牟利營私上下交征亂可
立待雖有報效百萬將焉取之至如所言禁賭則生計日
窮一省之民恃賭爲生計中外古今安有是理若謂盜風
譚文勤公奏稿

卷首

美

之熾由於禁賭言尤不經聞因賭而富盜賭輸而爲盜者
矣不聞賭可弭盜也無識之徒罔顧利害飾辭聳聽所言
萬不可信所請斷不可行奏上
上深韙之然言者猶不止至取中旨相壓府君復奏曰粵
人嗜賭甲天下自富商豪族官胥牙役收規開賭視爲故
常通衢僻巷莫不有館卽莫不有規歲以三十萬納公家
美其名曰報效此四成報效所由起幸而所得尙少害淺
禍遲設令竟集巨金則賭益盛害愈深禍愈速諸無賴自
禁賭後失所憑依挾賄行求款動言者不過謂賭禁一開
百萬立至否則徒飽官吏無益 國家有禁之名無禁之
實此輩豈知公義但欲幸償所欲藉以自肥若欲責數百

萬不可得也卽竟得之亦猶飲酖止渴終必隨敝今日之事但問當禁否耳不宜復計及難禁譬猶子弟縱博父兄必禁斷無因其難禁而反縱之至於官司歇法國有常刑豈可尤而效之因以爲利臣去年奏覆一摺祇奉硃批所奏甚是著一體禁止欽此仰見

聖明洞燭利弊故敢據實縷陳非敢顯違

諭旨也奏 畱中而事竟寢終府君任與賭禁終始焉廣東濱海互市最先交涉繁於他省府君一據公理非條約明許不肯絲毫遷就雖恫喝無所讓英吉利欲築九龍至廣州鐵路法蘭西索合浦縣礦權皆力拒絕二十三年膠州變起電奏宜力爭不可許許卽無以爲國語絕嚴正當

譚文勤公奏稿

卷首

三

事稍厭苦之及英租九龍法租廣州灣已定約乃告總督府君始聞卽電奏言其形勢關繫不可輕許狀竟無及則大憤旣而歎曰國勢不振極矣業許德誠無辭拒英法乃奏言兩害相形取其輕英於九龍勢已固宜舍勿爭專力待法法所索廣州灣界幾盡吳川遂溪縣境大背租約又東海瓊州兩島在海中爲高廉欽往來孔道尤不可許絕交通路相持一年遂溪吳川民相與爲團練拒敵府君復遣將將五千人爲聲援勢洶洶不相下二十五年秋朝廷乃命廣西提督蘇元春莅廣州灣議界事府君具分別可許不可許堅屬理爭蘇至則盡許法所索無少辯難亦不關白府君府君大怒電奏劾蘇請立廢所定約會遂

溪民與法兵鬪傷其渠長法人言於朝必斬知縣府君
電陳此皆總督事無與知縣法屢傷吾民將何以償

朝廷重開邊衅命黜遂溪知縣以謝界遂定府君歎曰爲
國家守土不能保又重傷吾民何顏復居此乎乃上奏
力求解任於是府君五上疏矣中間一蒙人獲之

賜

給假相屬終不得去十一月奉

旨迅速來京 陛見旋以奏陳病狀

賞假兩月回籍就醫明年以

萬壽恩

賞戴雙眼花翎四月入都

譚文勤公奏稿

卷首

召見 頤和園

三

恩慰隆厚以府君拜起艱

特命內侍扶掖府君力陳衰老恐誤 國事非敢惜身乞

許開缺三請乃奉

俞旨仍命畱京當差府君自以必與祝 嘏後乃請歸而

拳亂大起朝官多勸速行府君曰明知無官守畱無益然

嘗爲大臣覩 國難忍先去耶因不復言至七月

西幸始以衰疾增劇乞歸家居五年以老謝客絕口不問

世事被服儒素忘其貴官至於憂 國之誠時時見於辭

色嘗獨坐歎憤或有聞見輒累日不怡嗚呼府君之深識

遠慮固未易一二言也府君爲學以躬行實踐爲主持已

敬而與人忠尤篤故舊同年生劉君歿京師獨歸喪其家爲經紀之晚年更修葺其墓福州將軍卒子幼負公私責巨萬盡以署任所入代償有餘悉贖之將吏有勞動死無以歸必厚贖贈存活其妻子遣吏爲規畫前後凡十餘人視僚屬若子弟用惟其長不以喜怒進退有過面斥責不爲姑息當時幾不自容後無不知感者所密舉當世人才甚眾皆不令知性嚴毅當官守法無所撓屈意所不可雖詔旨不少阿官知府時總督過境騶從暴橫立擒笞之巡撫欲曲法活人令按察使諭意卒持不可廓爾喀使臣入覲攜譯人所過婪索至陝西府君謂曰使臣入侍

天子從者所爲不法此不可至京師宜畱下吏譯人叩頭

譚文勤公奏稿

卷首

三

流血使臣亦跽請乃曰後復爾歸時吾斬汝矣亮節清操由於天性生平無華侈之奉珍異之好然不肯苟自潔以污人管閩海關旣一無所取粵海關歲餽總督數萬悉發善後局充公用亦終不自言嘗稱曰今日大患在近利而不務實二者不除國終不振又曰興利必先除弊不然是興弊也故其爲治惡粉飾戒虛糜視公家之事逾其私言理財專以節冗費除中飽爲務不稍加歛於民甲午以後國債起諸省競增釐稅議房捐紛然相繼府君所部獨一無所舉然事亦辦至救濟山東西湖廣災荒甘肅回亂不待調發立致巨金累數十萬皆取節儉所蓄及俸餘不以勞司庫聞者歎服若夫臨大事決大疑顏色不變徐起而

定之嘗誦言不動聲色措天下於泰山之安蓋白期許然也故其所計畫宏大精密本末燦然度事不行行之無益決不輕發發必事立效著不爲人挾持準律定讞老吏無以難服官五十年未嘗一干吏議被謫謫也府君秉質強固自治極嚴飲食起居皆有常度未明而衣秉燭待旦數十年如一日非其精力有大過人者乎本起科第未嘗以學業自表褻晚歲里居偶與博學通儒言及詩南東其畝左傳說非是一坐驚其確實既積憂勞兼跋涉南北感嬰寒暑初受於目晚年患中寒時有末疾雖神明愈漚而體力日衰微矣三十一年春若有前知堅屏藥餌三月十二日亥時端坐而終去生年道光二年三月十九日享年八

譚文勤公奏稿

卷首

罕

十有四天平痛哉遺疏聞

天子震悼照總督例

賜卹

賜祭葬

子諡文勤

賞子孫官有差配陳氏

封一品夫人先

府君三十年

卒葬茶陵側室顏氏

封宜人鍾氏

封恭人皆前卒李

氏 封恭人劉氏

封宜人子男五人長寶箴附貢生安

徽試用道奉

旨服闕後儘先補用次寶符中書科中書早卒延闈翰林院庶吉士恩闈從一品蔭生澤闈分部郎中女適善化附

生唐贊慈孫六人冠宸中書科中書卒輔宸從二品蔭生
特用主事奉

旨賞員外郎繼祖拔貢生候選同知卒翊宸光宸贊宸孫
女四長適翰林院編修尹銘綬曾孫三人壽曾頤曾嗣曾
曾孫女一不孝等侍疾不謹罪通於天偷生視息將如吉
卜以三十二年二月戊戌朔己未葬我府君於善化白泉
荷葉塘之原謹就府君立 朝大節追憶舊聞述其學犖
大者不敢稍涉虛誣以重罪戾伏維當代 宏達君子錫
之銘誄傳示無窮世世子孫感無既極謹狀 不孝 寶箴延
闔恩闔澤闔泣血狀

賜進士出身

譚文勤公奏稿

卷首

望

誥授中憲大夫道員用前署江西提學使司提學使翰林
院編修門下士汪詒書頓首拜填諱

譚文勤公奏稿卷一目錄
保送御史請申明定例摺

導 旨議奏摺

補授河南按察使謝 恩摺

恭報接印任事日期摺

護理陝西巡撫謝 恩摺

籌畫邊防並遣撤營勇另行添募摺

探報甘省軍情片

交卸撫篆接藩司本任謝 恩摺

敬陳悲戀顛懇 節哀摺

譚文勤公奏稿 卷一目錄

譚文勤公奏稿卷一

保送御史請申明定例摺

奏爲請申明保送御史之例以肅臺諫而慎言路恭摺仰

祈

聖鑒事竊惟科道爲

朝廷耳目之官匡政治之闕失糾臣寮之奸邪通下情之壅蔽職雖微而所關甚鉅我

國家慎重言路滿漢御史員缺例由各部院保送升補非洞達治體砥礪廉隅之員不得濫保近來各衙門循例咨送不辨淑慝於是賢否混淆言路龐雜或毛舉細故不識大體或瞻徇情面受人指使甚至招搖納賄顛倒是非種譚文勤公奏稿

卷一

一

種謬妄難逃

聖明洞鑒夫以風憲之地有此飭法營私之員非特臺諫無色抑亦政體有關臣愚以爲整飭於敗露之後不若審慎於保送之先相應請

旨飭下各部院衙門申明定例嗣後保送滿漢御史須擇品端守潔之員儻保送之後有貪污劣跡則原保之堂官分別交部議處庶幾有所責成而所保不濫有所牽制而咸知自斂亦正本清源之一端也臣愚昧之見是否有當伏乞

皇太后

皇上聖鑒謹

奏

遵 旨議奏摺

奏爲遵

旨議奏事同治三年三月初十日奉

旨交下惇親王及編修蔡壽祺具奏摺件著王公大學士
翰詹科道會議又於十四日奉

旨發下醇郡王等各摺著一併詳議具奏欽此仰見

皇太后

皇上審慎周咨之意臣等恭閱惇親王醇郡王等所奏均

係爲大局起見恭親王自議政以來夙夜在公尙無貽誤

屢荷

譚文勤公奏稿 卷一

優詔獎其賢勞在

二

聖恩非私於一人此天下臣民所共信者也至於召對之
時語言詞氣諸多不檢恭親王渥承

寵眷自蹈愆尤誠不得爲無罪一經

天威震疊當必愧悔交集補救不遑臣等伏念海內多事

之秋全賴一德一心共資康濟而於懿親爲尤甚若廟廊

之上先啟猜嫌根本之地未能和協駭中外之觀聽增

宵旰之憂勞於大局實有關係臣等忝居諫職未敢緘默

不言至用舍之權操之自

上則非臣下所敢妄議也臣等意見相同謹合詞繕摺覆

奏伏乞

皇太后

皇上聖鑒謹

奏

補授河南按察使謝

恩摺

奏為恭謝

天恩仰祈

聖鑒事竊

臣

於同治七年八月二十三日接奉浙江撫

臣

行知七月二十九日奉

上諭河南按察使著譚鍾麟補授欽此祇聆之下感悚莫

名伏念

臣

楚南下士由編修升任御史蒙

聖恩簡用知府典郡三年涓埃未報茲復渥荷

譚文勤公奏稿

卷一

三

鴻慈破格超擢忝竊逾分惕息難安查豫省處四達之衝

臬司匯刑名之總平情執法課吏安民風紀攸關責任綦

重非

臣

愚所克負荷惟有趨叩

闕廷敬聆

聖訓庶幾確有遵守藉以勉副

生成所有

微臣

感激下忱謹繕摺叩謝

天恩卽於拜發後迎摺北上伏乞

皇太后

皇上聖鑒再

臣

此次拜摺係借用杭州府印信合併陳明

謹

奏

恭報接印任事日期摺

奏爲恭報接印任事日期叩謝

天恩仰祈

聖鑒事竊臣於十一月十九日趨詣

闕廷恭覲

天顏二十六日荷蒙

召見跪聆

聖訓遵卽

陛辭出都於十二月十七日行抵河南省城適撫臣李鶴

年親駐滎河督工臣趨赴工次謁見撫臣札催赴任當卽

星馳回省二十四日准署按察使臣蒯賀蓀將印信文卷

譚文勤公奏稿

卷一

四

移交前來臣恭設香案望

闕叩頭祇領任事伏念河南居天下之中臬司匯刑名之

總事繁責重報稱爲難惟有隨同撫臣遇事詳慎力求整

頓以期仰答

鴻慈於萬一所有微臣到任日期並感激下忱理合繕摺

叩謝

天恩伏乞

皇太后

皇上聖鑒謹

奏

護理陝西巡撫謝

恩摺

奏爲恭報

微臣

接護撫篆日期叩謝

天恩仰祈

聖鑒事竊

臣蒙

恩簡授陝西布政使十年十二月初七日

陛辭出京於本年正月二十二日抵陝二十六日前撫

臣翁同爵奉到

批回摺件同治十一年正月十八日內閣奉

上諭前有旨令邵亨豫署理陝西巡撫邵亨豫未到任以前著譚鍾麟暫行護理欽此二月初一日據署西安府知府李慎撫標中軍參將陳照臺將

王命旗牌關防文卷齎送前來

臣

當卽恭設香案望

譚文勤公奏稿

卷一

五

關叩頭祇領任事

臣

猥以菲材疊膺

超擢涓埃未報惕息難安茲復渥荷

溫綸護理撫篆聞

命之下彌切悚惶念秦中瘡痍初復元氣宜培隴右餘逆未平邊防孔亟吏治軍儲在在均關緊要如

臣

禱昧懼弗能勝惟有益矢慎勤隨時隨事稟商督

臣

認真籌辦斷不敢以暫時護理稍涉因循冀仰酬

高厚鴻慈於萬一所有

微臣

暫護撫篆日期謹繕摺具報

恭謝

天恩再

臣

經過直隸河南地方麥苗甚茂入陝以後連日

大雪盈尺麥秋可望豐收民情均極安謐堪慰

宸廡合併陳明伏乞

皇太后

皇上聖鑒謹

奏

籌畫邊防並遣撤營勇另行添募摺

奏爲籌畫陝省邊防並遣撤略武四營另行添募以期得力恭摺仰祈

聖鑒事查陝西防軍經前撫臣蔣志章奏調總兵李輝武

回漢中本任替出提督譚仁芳所部仁勝一軍分紮北山

復經撫臣翁同爵檄飭原駐北山之提督周家盛等五營

歸譚仁芳統領總兵王名滔所部略武四營都司楊達思

譚文勤公奏稿

卷一

六

一營歸李輝武統領先後奏明在案臣到陝後據各路探

報甘肅兩當徽縣均有零股回逆竄擾因鞏昌防堵嚴密

該逆欲歸無路游弋於徽縣所屬之榆樹壩江南壩等處

與鳳寶毗連不特西南邊境防範宜嚴秦州運道尤須加

意保護當卽咨調李輝武所部律武左右兩營一由略陽

一由鳳縣馳赴徽縣會同提督殷華廷扼要駐紮相機堵

剿惟李輝武五營不敷分布前撫臣翁同爵曾飭王名滔

率略武四營開赴三原歸李輝武統帶乃遲延日久未據

開拔且聞其勇丁多半疲弱難期得力臣已檄令王名滔

悉數遣撤由李輝武另募六營以新集之軍分布褒沔以

原駐大安驛兩營填紮鳳縣現在北山靜謐經延榆綏鎮

道分營扼紮各要隘可保無虞暫畱譚仁芳所部仁勝四營駐守隴竇與李輝武各軍聯絡以壯聲援前甘肅提督曹克忠各營尙駐乾州經前代辦撫臣英奎咨商已派馬隊兩營紮隴州步隊五營紮竇雞於陝防較爲周密至省城爲根本重地漢回雜處奸宄最易潛蹤現飭在省各營分紮城關巡查彈壓臣蒞陝未久一切防勦機宜隨時與譚仁芳李輝武悉心商辦總期密益加密以固藩籬除前敵軍情由督臣自行奏報外所有籌畫邊防並遣撤營勇另行添募各緣由謹繕摺具奏伏乞

皇太后

皇上聖鑒訓示謹

譚文勤公奏稿

卷一

七

探報甘省軍情片

再臣正封摺拜發間接據漢中鎮李輝武二月十八日自竇雞來函據稱西路探勇回報二月初十日辰刻有馬步賊匪五六百人由白馬關竄至大南峪焚掠未刻已至距略陽百二十里之郭家壩該處團首李自新督團丁扼守被賊斫傷十一日竄至瑤坪將入陝境適統帶律武左營劉楚華率勇赴徽行至略陽迎頭截擊旋調大安驛律武前後兩營各出七成隊前去堵勦諒此小醜數百當不敢覬覦陝南惟律武左右兩營調赴徽縣前後兩營已出列隊律武忠營填紮鳳縣恐漢中空虛人心驚惶現在親募

六營業已成軍以三營駐漢郡藉資彈壓兼顧川省門戶
以三營紮寶雞居中策應旋據漢中府縣及略陽縣稟報
大略相同除飛飭李輝武嚴密布置確實偵探相機迎剿
外相應附片陳明同日又據甘肅涇州偵探委員陝西候
補知縣王遇春稟稱探得西甯河州兩處回酋先後赴督
臣安定大營投誠願繳鎗礮馬匹二十七二十八等日河
回已繳軍械數百件馬七八百匹督臣左宗棠未敢深信
一面聽撫一面調集各營分紮要隘現在前敵運道尚無
梗阻合併聲明伏乞

聖鑒謹

奏

譚文勤公奏稿

卷一

八

交卸撫篆接藩司本任謝

恩摺

奏爲恭報

微臣

交卸撫篆接藩司本任日期叩謝

天恩仰祈

聖鑒事竊

臣

前蒙

恩命暫護撫篆業將到任日期具報同治十一年二月十
八日奉

旨知道了欽此三月初十日署撫臣邵亨豫抵陝十三日
臣交卸撫篆卽於是日准署布政使臣英奎將藩司印信
文卷移送前來臣當卽恭設香案望

闕叩頭祇領任事伏念陝省當患貧患寡之秋藩司有裕
國裕民之責舉凡用人行行政籌餉招墾事事均關緊要如

臣 禱昧懼弗能勝惟有實力實心勤慎自矢隨時稟商督撫臣認真辦理以冀仰答

高厚鴻慈於萬一所有微臣交卸撫篆接任藩司日期謹

繕摺具報恭謝

天恩伏乞

皇太后

皇上聖鑒謹

奏

敬陳悲戀籲懇 節哀摺

奏爲敬陳悲戀下忱籲懇

節哀仰祈

譚文勤公奏稿 卷一

九

聖鑒事竊臣於同治十三年十二月二十一日奉撫臣行

知接奉禮部咨文痛悉

大行皇帝

龍馭上賓伏地哀號莫知所措當卽隨同撫臣舉哀成服

伏念

大行皇帝臨御寰宇十有三年

聖德覃敷

武功震鑠薄海內外莫不戴荷

生成微臣忝邀

恩遇洵陟陟陝藩感激涕零更難言狀遽聞

變輿晏駕不禁摧裂五中欽惟我

皇上大統續承

付託至重惟有籲懇

勉節哀思勤求郅治上慰

在天之靈下孚臣民之望臣不勝哀痛懇切之至謹瀝忱

具奏伏乞

皇上聖鑒謹

奏

譚文勤公奏稿

卷一

十

譚文勤公奏稿卷一

男寶箴恭校

譚文勤公奏稿卷二目錄

補授陝西巡撫謝 恩摺

恭報接印日期摺

賞頭品頂戴謝 恩摺

奏陳司道接辦糧臺事務摺

請催各省應協金營月餉片

請 飭催各省欠餉摺

請催提欠餉片

請仍飭劉典速赴蘭州片

清釐司庫節年奏銷陳請核銷摺

陝西舊欠東三省俸餉請暫展緩片

譚文勤公奏稿 卷二目錄

查明特參各案據實覆陳摺

東鄉縣匪徒滋事籌辦情形摺

譚文勤公奏稿卷二

補授陝西巡撫謝

恩摺

奏為恭謝

天恩籲請

陛見仰祈

聖鑒事竊臣於光緒元年三月初八日准撫臣邵亨豫咨

開准吏部咨二月二十日內奉

上諭陝西巡撫著譚鍾麟補授欽此欽遵恭錄轉咨到臣

當即恭設香案望

闕叩謝

天恩訖伏念臣楚南下士由御史出守杭郡洵擢秦藩在

譚文勤公奏稿

卷二

一

任三年毫無報稱茲復仰承

恩簡畀以封圻聞

命自

天負慚無地竊思陝西地當邊徼隴上幸就肅清塞外尙

勞師旅巡撫有綏戢之責籌防籌餉均關緊要如臣樛昧

深懼弗勝惟有趨詣

闕廷跪聆

聖訓庶有所稟承而免隕越所有微臣感激下忱並籲懇

陛見緣由謹繕摺叩謝

天恩伏乞

皇太后

皇上聖鑒訓示謹

奏

恭報接印日期摺

奏爲恭報

微臣

接印任事日期叩謝

天恩仰祈

聖鑒事竊

臣

恭膺

簡命補授陝西巡撫謹卽具摺恭謝

天恩於四月初四日奉

旨昨據邵亨豫奏請已有旨批示該撫卽著毋庸來見欽

此隨准前撫

臣

邵亨豫於四月初七日派委西安府知府

李慎撫標中軍參將胡得成齎送巡撫關防

譚文勤公奏稿

卷二

二

王命旗牌並文卷等項移交前來

臣

卽恭設香案望

闕叩頭祇領任事伏念

臣

一介庸愚毫無知識自擢任藩

司以來涓埃未報悚惕方深茲復仰沐

殊恩畀以疆寄責任愈重報稱愈難况陝境甫安邊防未

撤凡整飭吏治撫綏地方籌餉練軍各事宜均屬方今要

務

臣

惟有殫竭血誠實事求是矢夙夜勿欺之志守始終

如一之忱固不敢操切圖功亦不敢因循廢事以期仰副

聖主委任之至意所有

微臣

接印任事日期除循例題報

外謹繕摺叩謝

天恩伏乞

皇太后

皇上聖鑒謹

奏

賞頭品頂戴謝

恩摺

奏爲恭謝

天恩仰祈

聖鑒事竊臣於光緒元年正月二十七日接准正白旗漢

軍都統金順咨稱五月初二日准吏部咨開內閣鈔出同

治十三年十二月初十日奉

上諭金順督師西征經陝西籌撥餉項軍火源源接濟均

能無誤要需自應量予獎敘布政使譚鍾麟著賞給頭品

頂戴欽此欽遵恭錄到臣跪聆之下感悚難名伏念臣供

譚文勤公奏稿

卷二

三

職詞垣備員諫院曾珥貂蟬於內史旋陪解豸於外臺筦

鑰虛持凜維藩之重任封圻忝寄躋開府於長安仰沐

高深未酬涓滴比以勞師塞外餽饟關中本屬職分所應

爲祇期轉輸之無誤迺荷

殊眷錄及微勞聞

命自天抱慚無地念頭銜之忽晉

恩重三山幸章服之增榮衣披一品糜頂踵而莫報矢感

戴以靡涯臣惟有殫竭愚誠願全大局時箴赤芾免貽誚

於鶴梁願請長纓冀肅清夫雁塞所有微臣感激下忱謹

繕摺叩謝

天恩伏乞

皇太后

皇上聖鑒謹

奏

奏陳司道接辦糧臺事務摺

奏爲司道接辦西征糧臺業已接收清楚謹將各省關欠餉開單陳明恭摺仰祈

聖鑒事竊臣前准部咨光緒元年三月二十八日奉

上諭袁保恆已令回京供職西征糧臺已諭左宗棠責成陝西藩司經理應行奏催及咨行各省事件呈由陝西巡

撫覈辦等因欽此欽遵在案旋准督臣左宗棠咨委署藩

司裕寬接辦西征糧臺事務並委駐陝軍需局陝安道沈

譚文勳公奏稿

卷二

四

應奎就近幫辦以資熟手茲據該司道等詳稱五月初一日接管西征糧臺先後准戶部左侍郎袁保恆將經手一切款項卷宗移交司道等於六月十三日逐一接收清楚並將糧臺經催各省關協餉積欠數目開單呈請具

奏前來臣查各省關協解西征軍餉歷年解不足數積欠

至二千六百餘萬之多經糧臺按月咨催已成例案就同治十三年一歲收數核之督臣左宗棠每年專餉六百一

十四萬四千兩實解到者三百三十四萬四千兩前甯夏

將軍穆圖善專餉由臺經催者一百零八萬解到者祇十

七萬五千兩提臣雷正綰每年專餉三十萬兩實解到者

祇八萬兩綜計所收尙不及半而穆營雷營月餉不敷尤

鉅悉由督臣軍餉內通融借支愈分則愈少此必不可支之勢也現在新疆軍務及關內外糧運事宜均歸督臣左宗棠督辦各軍陸續出關此後軍行愈遠運費愈重全賴各省關竭力籌濟方足以措危局而策成功臣亦知各省關庫款均形支絀若將前數年積欠一時悉數措解固屬萬難然若仍如前數年解不足數必致貽誤關係匪輕除由臣隨時分別咨催外相應請

旨飭各省關以後照原協餉數按月提前籌解並將前欠陸續彌補以濟急需理合將各省關欠餉數目另繕清單恭呈

御覽所有司道接收糧臺事務業已清楚緣由謹繕摺具譚文勤公奏稿

卷二

五

奏伏乞

皇太后

皇上聖鑒謹

奏

請催各省應協金營月餉片

再各省關應協烏魯木齊都統金順月餉向係西征糧臺咨催到陝由該都統所委駐陝局員自行領解現在該軍遠在前敵需餉孔殷除由臣分別咨催外應請

飭下各省關提前撥解協餉以資接濟至前烏魯木齊都統景廉軍餉本係自行催解各省應協餉數無從查悉茲該軍已歸金順統帶自應歸併代催現已移咨金順將景

營協餉數目開明一俟咨復到日再行提催謹附片陳明
伏乞

聖鑒謹

奏

請 飭催各省欠餉摺

奏爲軍餉匱乏懇

恩飭部指提各省積欠湊發年終滿餉以固軍心而作士
氣恭摺仰祈

聖鑒事竊臣前奏西征糧臺接收清楚請飭催各省關欠

餉一摺欽奉

諭旨著臣督飭該司等悉心妥辦俾前敵得以源源接濟

譚文勤公奏稿

卷二

六

毋任稍有匱乏等因欽此仰見

聖懷廼念邊事垂恤兵艱之至意竊查各省關應協陝甘

軍餉自本年五月初一日陝藩司等接管西征糧臺起截

至八月底止四月之中祇收銀八十餘萬兩以督臣左宗

棠現在營數計之每月需實餉四十餘萬兩卽以此悉發

月餉亦僅得其半況督臣奉

命出關兼籌糧運近於新疆南北兩路創設採運數道計

程皆四五百里而遙糧價運費十倍內地每月又非二十

萬不敷支放而且舉辦屯墾有費購買車駝有費製備軍

火器械有費整頓營伍裁撤勇丁有費出款日增入款愈

少數月來得以勉強支持者恃借到洋款三百萬除還舊

欠外尙有百七十餘萬悉解大營稍資挹注然隨到隨散現亦告罄矣本年各營月餉固未滿給並有鹽菜尙未按給者轉瞬年關需餉如命若仍不發一月足餉何以泯缺望之心而作效忠之氣查同治九年至十二年節歷經袁保恆奏蒙

恩施飭部催提積欠六十萬兩爲各營年終一關滿餉分別撥解在案現在出關諸軍整理待發月餉之外益以糧運諸費窘乏情形較往年爲尤甚前月業經臣飭委各員分赴廣東江蘇湖北四川等省守提出關糧運的餉百四十餘萬仍無報解消息合無仰懇

天恩飭部速議分別指提各省關欠餉六十萬爲年終一譚文勤公奏稿

卷二

七

月滿餉不准稍有蒂欠並將各省奉撥出關糧運的餉一併如數籌解務於十月內外趕解到陝轉運前敵以資支發西事幸甚大局幸甚謹將軍餉匱乏情形據實縷陳恭摺具奏伏乞

皇太后

皇上聖鑒謹

奏

請催提欠餉片

再金順豫師軍餉向由西征糧臺經催景廉所部現歸金順接統自應一併代催查自五月以來金順月餉十三萬除陝西每月一萬五千兩儘先籌解外各省僅報解二萬

五千兩欠解之數爲數甚鉅景廉月餉七萬五千僅報解一千八百兩豫師月餉三萬五千僅報解一萬兩此外如明春軍餉張曜駝乾均未經報解到臺而金順糧運張曜屯費明春糧價悉由督臣設法挪墊勉顧大局各軍待哺嗷嗷又無別款可以劃還是以督臣軍餉益形匱乏理合仰懇

天恩一併飭部催提積欠以資接濟而清款目謹附片具陳伏乞
聖鑒謹

奏

請仍飭劉典速赴蘭州片

譚文勤公奏稿

卷二

八

再臣准兵部咨光緒元年八月十六日內閣奉

上諭王文韶奏據情代奏一摺據稱現接幫辦陝甘軍務候補三品京堂劉典呈稱母衰年邁病尚未痊懇請在籍養親治病等語覽其代奏各節尙屬實在情形劉典著毋庸幫辦陝甘軍務欽此欽遵恭錄移咨到臣竊維督臣左宗棠奉

命督辦新疆軍務自應親督諸軍出關後路防軍百數十營遠者相距三千餘里公牘往來動需兩月倉卒有事無所稟承大兵直搗烏城計不難立拔而白彥虎一逆兇悍異常飄忽無定難保不窮蹙內竄後路情形喫重必得一與諸軍相習者爲之統攝斯聲氣足以聯絡局勢不至散

漫默計督臣左右堪此任者實難其人昨有自南中來者臣詢悉劉典實無大病特以高堂年邁依依膝下不忍遠離而其母深明大義聞

命之日以西事爲重慷慨諭劉典西行揣劉典所以懇辭者或因前以養親乞退一旦絕裾而行恐天下士議其後耳殊不思徇私情而不顧

國家之急亦於大義有乖且其兄弟眾多侍養有人更與家無次丁者有別相應請

旨敦促劉典速赴蘭州如以母老爲念一俟新疆事定仍

准歸養以遂初志庶公義私情兩無所憾臣與劉典向未

謀面前在浙時聞其總理督臣營務洞悉機宜深得士心

譚文勤公奏稿

卷二

九

爲楚軍所悅服若令駐蘭專顧後路俾督臣得以壹意前

敵迅赴戎機早戡一日之功即可省一日之餉並可以少

紓

朝廷西顧之憂臣愚昧之見是否有當伏乞

聖鑒訓示謹

奏

清釐司庫節年奏銷陳請核銷摺

奏爲清釐司庫節年奏銷開造實支實用各數陳請核銷

恭摺仰祈

聖鑒事竊查陝西自咸豐十年辦理奏銷後卽值軍興籌防籌餉需費浩繁司庫左支右絀羅掘一空未能依限奏

銷十餘年來屢經展緩臣前在藩司任內逐漸清理歷年款目收支既未能如額奏銷卽難以照例詳請經前撫臣邵亨豫奏請變通定例辦理奉

旨該部議奏欽此嗣准部咨議覆令自咸豐十一年起至同治十三年止卽行查明每年司庫出入實支實用數目造具簡明清冊咨部核銷以後仍應按年照例辦理於光緒元年五月十五日具奏奉

旨依議欽此欽遵咨行到陝當卽行知署藩司裕寬委員督同各書將司庫收支各款自咸豐十一年起分年分案逐款清釐茲據藩司蔣凝學詳稱接任以來督飭候補知州濮垚布政司理問王涑庫大使馬旬宣詳細核算積十

譚文勤公奏稿

卷二

十

年之案閱六月之久始得一律勾稽銷算完竣查收款以地丁爲大宗協餉次之釐金捐借各款又次之支款以軍需爲大宗旗綠各營餉次之雜支各款又次之現查軍需局報銷提用司庫之銀與司檔逐一核對數目相符旗綠各營欠發者尙多至雜支款目紛繁有以支作收者有以領抵解者有暫列未支項下俟庫裕再行酌量補發者有挪借未經籌還應歸捐輸請獎者統計自咸豐十一年起截至同治十三年底止出入相抵尙有不敷預提光緒元年地丁銀二十八萬九千餘兩其餘兵馬本色糧料草束及常社倉糧均照實收實支造具簡明清冊咨部核銷並縷陳各款不能照例奏銷緣由詳請具奏前來臣覆核無

異謹將實支實用各款目另繕清單恭呈

御覽顯懇

天恩俯准核銷以清積案而重庫款除各冊咨部外謹繕摺具陳伏乞

皇太后

皇上聖鑒謹

奏

陝西舊欠東三省俸餉請暫展緩片

再臣承准軍機大臣字寄光緒元年十月十五日奉

上諭崇實等奏請擬東三省來年俸餉並請飭催欠餉一

摺直隸等省積欠銀兩著譚鍾麟按照單開設法籌措務

譚文勤公奏稿

卷二

十一

於年內解齊以便散放本年積欠各項要款原單著鈔給閱看等因欽此臣卽欽遵查閱清單內開乙卯年俸餉案內陝西欠解雜項銀二萬一百二十九兩七錢丙辰年俸餉案內又欠解雜項銀四萬兩又欠解耗羨並扣半養廉銀一萬兩當經恭錄行司籌解去後茲據藩司蔣凝學詳稱陝省欠解東三省乙卯丙辰等年俸餉銀七萬一百二十九兩七錢自應遵

旨趕緊籌解以濟要需無如陝省軍興年久地荒蹂躪殆遍現雖腹地肅清民間元氣未復各屬地丁錢糧徵解仍未敷額每年收儲銀兩又因籌撥邊防各軍口糧及旗綠各營官兵俸餉文職廉費並雜支製造賑撫各款搜括一

空現在庫儲萬分短絀卽本省應發之款亦已左支右絀
若再撥解積欠俸餉實屬刻難籌措等情具詳仍請奏咨
展緩前來臣查陝省積欠東三省俸餉銀兩攸關兵食如
果稍有餘力何敢再事推延第陝省常年所入尙不敷出
軍興後人民逃散田荒未闢近雖賑墾兼籌瘡痍尙未盡
復各屬地丁徵解仍難敷額以致庫款奇絀籌撥邊防各
軍口糧及製造賑恤各款並旗綠各營俸餉時多掣肘該
司所詳無頂可籌尙屬實在情形相應據實奏懇

天恩俯准暫行從緩一俟各屬地丁錢糧照數徵收庫款
充裕卽當陸續籌解以清積欠除分咨外所有陝西舊欠
東三省官兵俸餉銀兩現仍無款籌解請暫展緩緣由理
譚文勤公奏稿卷二

十二

合附片陳明伏乞

聖鑒謹

奏

查明特參各案據實覆陳摺

奏爲遵

旨會同查明特參各案情形據實覆陳仰祈

聖鑒事竊臣鍾麟於上年七月十四日承准軍機大臣字

寄光緒元年七月初六日奉

上諭有人奏特參陝省挾詐營私各員並陳錢糧倉穀等
弊一摺據稱陝西鄠縣知縣王驥衢縱囚害良長安縣知
縣張國鈞於革員戴昌泰詐贓一案受賄不結現任華州

知州胡燾前署甯陝廳同知任用訟棍等魚肉平民得賄
銷案並有勒徵荒糧帶勇擾民各重情知府李慎改擬重
案致斃人命西安府知府納賄釀命勒結京控各案至該
省錢糧各州縣竟有以荒作熟以完作欠情事出入倉穀
亦多弊竇請飭查辦等語該御史所奏如果屬實亟應嚴
行懲辦著左宗棠譚鍾麟按照所參各節認真查辦據實
具奏毋稍徇隱原摺均著鈔給閱看將此各諭令知之欽
此遵

旨寄信前來臣鍾麟當卽移咨臣宗棠欽遵辦理一面轉
行藩臬兩司檢齊各案卷宗認真確查臣宗棠於奉

旨後亦卽飭詳細查覆茲據藩司蔣凝學臬司裕寬按照

譚文勤公奏稿

卷二

十三

所參各節逐一查卷核明議覆會詳前來臣等覆加確核
如原參鄆縣知縣王驥衢縱囚訛詐並聽勾引婦女進監
住宿及委查概不准理一節查監犯樊董城因毆傷姦拐
罪人常五薜擬絞減流配逃被獲收監曾託素好之劉丁
娃等向李榮祥索欠爭毆控縣李榮祥撞見同監劉城江
之妻鄭氏送飯誣爲樊董城勾姦赴府呈控經西安府知
府李慎派委候補知縣侯鳴珂前往查悉前情取具並無
訛詐勾姦切結由府稟經前臬司英奎飭審未結此外並
無受害之家控告旋於同治十一年二月接准部咨樊董
城改發近邊充軍該縣王驥衢因原告李榮祥挾嫌誣控
屢傳不到卽將樊董城請牌發遣並無概不准理之事又

原參已革同知戴昌泰前因拷詐鄉民經控訊明任聽長
安縣知縣張國鈞受賄放逃一節查戴昌泰前在署甯陝
廳任內被廳民列控丁役拷詐撤省查辦抗交門丁董二
經前撫臣邵亨豫奏參革審嗣董二病故戴昌泰狡供推
卸發交長安縣看管因病取保逃逸查戴昌泰係未定罪
名官犯其在保潛逃該縣張國鈞專丁跟追探知由西路
行走已出陝境曾經稟司札飭平涼府縣會拏並由前署
臬司沈鵬元詳經臣鍾麟咨緝先將原告人等保釋俟戴
昌泰獲日另結並無賄逃情事又原參華州知州前署甯
陝廳同知胡燾貪鄙鑽營任用訟棍嫁禍誣陷押斃原告
詐索捏銷有鄧金德京控可稽及民人唐德發等京控坐
譚文勤公奏稿

卷二

七

誣王定邦殺死土客四名移害邱成富父子各情一節查
胡燾於同治七年在署甯陝廳任內已革同知鄧宗禹之
子鄧金綬糾阻採買兵米在逃拏獲從犯鄧宗謨鄧宗隲
潘文彬李代成焦可琴等稟經前署撫臣劉典飭解來省
發前署西安府知府楊光澍審辦鄧宗謨等先後在保病
故均由咸長兩縣驗明具報鄧宗禹事後翻控經前臬司
英奎提審逃匿不到輒使鄧金德控准都察院奏奉

諭旨解陝審辦行至山西漪氏縣鄧金德脫逃無蹤維時
有名鄧金華者赴臣宗棠衙門具控批飭回陝候訊亦於
中途逃逸嗣經傳到鄧宗禹發文長安縣典史衙門看管
又復潛逃經前撫臣邵亨豫奏參革拏隨案附參之該典

史徐光亨疏脫處分亦經准部議結其鄧金綬糾阻兵米
悉經已故鄧宗謨等供認確鑿並非胡燏鑾營誣陷解省
亦未用赭衣木籠鄧宗謨等在省病故與胡燏無涉並無
索詐情弊又華州客民唐德發等於同治四年領種荒地
拖欠歷年錢糧圖減未成添砌搜搶逼命重情京控解回
發交西安府提訊自具悔呈將唐德發黑啟明分擬徒杖
由司詳經前撫臣邵亨豫咨准部覆又已革都司王定邦
於同治五年私刻木質關防假札募勇誣買客民陳洪順
等煙土致勇丁邱瞞等殺傷陳洪順等三命報經前撫臣
喬松年飭將邱瞞就地正法王定邦審依偽造印信斬律
減擬滿流從重改發貴州效力贖罪詳經臣宗棠會同前
譚文勤公奏稿

卷二

五

署撫臣劉典具奏奉

旨交部議奏准覆各在案監生邱成富先被王定邦哄誘
說合煙土價銀實屬不知誑騙訊係無干並無移害刑詐
情事又原參改擬郿縣監犯榮大和罪名發回該府囑縣
致斃該典史不出病結賄和加捐一節查郿縣監犯榮大
和於同治四年間因代索欠麥起釁截傷孀婦宋傅氏身
死解審因犯供翻異駁飭確審維時該府李慎尙未到鳳
翔府任無從改擬亦無須授意致斃迨九年三月間該犯
在監病故該縣高箕承稟府檄委署岐山縣知縣況瀚驗
明填格詳報飭審該典史於啟麟並非不出病結旋因催
捐一事被控撤省因患病昏迷以監犯榮大和顛門有傷

稟經前臬司札委知府張秉莖與安府知府楊燾併案確
審該典史於未審之先病愈投悔隨提原驗官及刑禁醫
生訊取各結詳銷該典史被控之案亦已另案詳結並無
賄和代捐之事又原參長安縣民婦張強氏之子張新政
病故無嗣其媳張趙氏假冒有孕私買嬰孩姑媳互訟西
安府受金頁二百兩勒斷張強氏不得復管家事致釀逐
姑斃命一節查張強氏故夫張經年先撫養賈氏之子更
名張新銘爲嗣後張經年生子張新政與張新銘分居另
度同治十一年間張新政病故遺妾張趙氏懷孕兩月張
新銘欲將其子立繼親族不依控縣批候分娩再訊是年
九月張趙氏生子取名應璋張新銘捏稱非張趙氏親生
譚文勤公奏稿

卷二

七

誘令張強氏出名控府並賄囑其戚辛馮氏賴稱應璋爲
辛馮氏所生逼令認子希圖奪繼辛馮氏以夫早外出不
應誣其生子轉向張新銘滋鬧經該府李慎提案質訊得
悉其奸張強氏俯首認悔當以張新銘爲張族異姓養子
卽張新政無子亦不能以張新銘之子爲嗣况遺腹所生
眾據昭彰乃賄囑他人認子藉圖闖繼實屬險詐姑念當
堂吐實從寬責懲張強氏被哄誤控無顏對其子媳自願
另住張新銘家由張趙氏送給養贍聽其自便張趙氏矢
志撫孤另擇戚族經管家事不許張新銘干預以斷葛藤
取具各結完案查核府斷甚屬平允並無受賄徇袒清事
又原參綏德州職婦劉馮氏及安康縣舉人劉雲燦京控

各案冤抑勒結等情一節查劉馮氏因被賊擄逃回挾夫弟劉欽不願收畱之嫌訐訟不休並捏圖姦霸產等情控經都察院咨解回陝發交西安府審悉前情斷令母家領回安分取結詳經前撫臣邵亨豫咨覆詎劉馮氏復赴京翻控經步軍統領衙門奏奉

諭旨解回飭發臬司提集人證訊議詳經臣鍾麟提案訊明定擬覆奏又安康縣舉人劉雲燦因其父劉維新於同治四年被傅學等謀毆斃命民人楊生秀教唆傅學誣扳馬智主謀劉雲燦信實互相京控先後奏咨解陝發交西安府審實將傅學楊生秀分別問擬斬流由前臬司英奎詳經前撫臣邵亨豫奏交刑部議覆准如所奏辦理並無

譚文勤公奏稿

卷二

七

冤抑勒結納賄情事又原參華州知州胡燾貪鄙鑽營前在署甯陝廳任內修補坍塌城牆捐罰並行及藉修衙署椿樹詐財各節查胡燾於同治五年委署甯陝廳同知到任後六年八月陰雨連旬城垣坍塌當經胡燾丈量詳報因庫款支絀未便請帑興修用石填砌城根修造木城防守前撫臣喬松年以捻回交訂木城難資捍衛飭仍設法籌款興修胡燾卽督匠撙節勘估共實需工料銀一千五百三十七兩零選派紳董按照估定數目勸捐於七年正月興工因兵燹之後地方瘠苦籌捐不易隨捐隨修至八年四月工竣胡燾將捐戶花名及用過工料數目造冊詳報因係民捐民修捐數零星故未請獎現查用過工料及

捐戶花名清冊兩相勾稽均屬符合並無盈餘如果捐收一萬餘串僅用錢一千五百串有奇司事紳董及各捐戶何俱甘心緘默至稱藉修衙署椿樹詐財不知何指無從查究又原參錢糧爲維正之供歲有常額該省兵燹後曠土甚多不無荒糧該州縣竟有以完作欠以荒作熟一節查陝省承平時丁糧年清年款向無蒂欠軍興後全省糜爛北山著名瘠苦被災尤重連年招撫流亡賑墾兼籌迄今元氣未覆以致未完民欠歷經各前任撫臣奏奉

諭旨蠲緩敬刊謄黃遍貼曉諭各州縣卽欲以完作欠勢難欺隱至以荒作熟更無此理現在各屬招墾分給牛糧籽種已熟者尙難遽行升科何能以荒作熟強民完納至譚文勤公奏稿

卷二

六

稱鹿米名色查陝省祇興安府屬及甯陝廳有額徵祿米係供支各營兵糧並非鹿米折色卽係額徵地丁奏銷冊有此名目其顆兒運腳串票檢查向無案據亦無人民控告無從查辦又原參出易常平倉穀悉由倉書派領苦樂亦多不均及交倉時踢斛淋尖一石之糧不足完五斗之欠一節查陝省常糧向係分年出易咸豐四年奏請間年出易仍按存七出三之數先由各州縣詳院奉批後復由藩司及本營府州委員會同監放若干還倉時亦仍委員驗收軍興以後或被賊掠焚燬或挪供兵差急需各屬倉儲久空邇來並無出易之處卽無弊竇可言至稱重徵地稅加議罰款致良懦傾家斃命如果屬實自有苦主申訴

指名控告現今遍訪周諮實無其事以上所參各案多係同治四五六七等年各前司任內之案均經詳由各前撫臣分別奏咨或由外斷結批銷完案卷宗具在班班可考該兩司等無所用其迴護臣等覆加明查暗訪悉與所詳無異且案均審結多年無人控告似未便逐案提審徒滋拖累惟錢糧倉穀二款現時雖無弊竇第日久玩生不可不防微杜漸臣鍾麟因全省被擾倉儲空竭民鮮蓋藏方茲年穀順成業經通飭各屬於上年籌辦積穀舉行義倉粗有成效以後積儲日久不能不出陳易新以防霉變如原參所指各情弊亟宜隨時預防除督同司道飭各府州縣於所屬倉糧每遇出易時密訪糾察有犯卽行參辦外譚文勤公奏稿卷二

十九

旨查明特參各案緣由謹合詞恭摺具奏伏乞

皇太后

皇上聖鑒訓示再此摺係由臣鍾麟主稿合併陳明謹

奏

東鄉縣匪徒滋事籌辦情形摺

奏爲偵探東鄉縣匪徒滋事大概情形並籌辦事宜恭摺

馳陳仰祈

聖鑒事竊臣承准軍機大臣字寄光緒二年二月三十日

奉

上諭文格奏東鄉縣匪徒聚眾滋事現在籌辦情形一摺

著譚鍾麟飭令李輝武暫駐漢南居中調度派得力員弁管帶一二營前往認真防探與四川各營聯絡聲勢合力勦洗毋稍疏虞等因欽此遵

旨寄信前來臣於正月二十七日接署漢中鎮李輝武函稱准四川督臣咨以東鄉匪徒聚眾滋事令統帶陝軍前往督勦臣以李輝武所統川軍三營悉在川境漢中祇有陝軍兩營當飭駐防寶雞隴州之律武五營悉赴漢南聽候調遣令隨時確探具報並函商護理四川督臣文格體察情形如陝軍必須越境助勦則漢防尙須增調旋准文格覆稱川省已調裕字營及駐防廣元等處之律武三營又添派李有恆率所部二千人由敘南前進李輝武可暫

譚文勤公奏稿

卷二

三

駐漢南相機會勦嗣據李輝武各營先後探報袁廷蛟以減錢糧爲名聚眾滋事初萃峯城場經太平縣知縣祝玉芬前往解散黨羽無多袁廷蛟隨帶二百餘人踞蝦耙口王作三王錫三鄭曉亭等二三百人踞毛壩場另有開縣匪徒吳奉山糾聚數百人欲與袁廷蛟合廷蛟拒不納謂我輩求減糧價並非謀逆資之遣散而吳奉山竟分赴各場搶掠此正月間事也二月初十日管帶律武中營總兵雷遇春率隊至峯城場皆老年人看守門戶詢居民何往僉云聞官兵至均逃避山寨比曉以官兵祇誅滋事首惡其餘良民仍各安生業於是扶老攜幼相率歸來一切貿易如常十六日雷遇春率中前兩營駐紮蝦耙口見街市

爆竹聲喧闐老民迎前跪接連名爲袁廷蛟作保口稱丁糧價定情願自首維時統領川軍營官李有恆亦至東鄉吳奉山聞大兵雲集率黨遠颺官軍大張曉諭解散脅從令將袁廷蛟等首禍五人網獻而廷蛟不知所在臣昨接李輝武二月二十七日函稱東鄉現紮十數營兵力頗厚未有戰事所調赴漢南五營已派總兵劉楚華率兩營分紮定遠西鄉交界之孫家坪砂子坎各要隘爲川軍遙作聲援並飭雷遇春等設法誘擒袁廷蛟以獻探明吳奉山所在卽行勦洗並據署陝安道三壽署漢中知府林士班稟稱據定遠廳同知秦毓麒接太平縣知縣祝玉芬兩次復函謂袁廷蛟因糧捐起釁煽惑鄉愚該令曾往山寨親譚文勤公奏稿

卷二

三

見廷蛟諭以禍福鄉民各願具結散歸及至東鄉縣城而被害之紳紛紛請兵誅勦現有知府王元晉等至縣查辦冀可解散俟續得探報再行稟聞臣查東鄉與定遠西鄉相距五百餘里防範宜周已咨商李輝武確探情形如賊勢鴟張卽相機前進並飭漢中道府督同地方官嚴密布置勿稍疏虞所有探聞東鄉匪徒滋事情形並漢南防堵緣由謹繕摺由驛馳

奏至鳳寶隴州一帶臣已檄調譚仁芳所部五營填紮現在地方均極安靖合併陳明伏乞

皇太后

皇上聖鑒謹

奏

譚文勤公奏稿

卷一

三

譚文勤公奏稿卷一

男延闈恭校

08635

